

## ALLEEN HET GESPROKEN WOORD GELDT

Veurzitter, ich wil gear beginne met t belang van taal te benoadrukken.

Want behalve det we dur zinne van kinne make, we os kinne verstoan, is taal hiel veul mier. Ut is de drager van verhale van vreuger, van os gebroeke, van os cultuur, van weem we zien,. En.... hiel belangriek; zeker in deze tied, taal is veural auch de meugelijkheid um dich vanoet dien hert te uute, Vur mich is ut Heljes dialect daarom auch zoe belangriek, ut is de taal van mien hert.

Doa bin ich in opgegrujd en doa druk ich mich t leefste en mekkelijkste in oet. Doa kin ich mien gedachte en emoties ut biste in kwiet. Augh op pepeer en in de app. Gewoen wie ich dink det ich ut mot sjrieve. Doa is gin taalbeleid of beschermingsstatus aan te pas gekomme. Det hub ich van mien oaijers gelierd. Neet umdet die wiste det meertaligheid zoe belangriek is, of det Limburgs ein van de weinige toentale is, nea, umdet det noa einmoal gewoen waar.

Det mit de papepel ingeave kriege is daarom zoe belangriek. We zien bleij det in dit veurstil dur veul aandacht is vur de kingeropvang en sjoele. Nag neet ins zoe zier um doa dialect te liere mer veural des se ut *moogs* spreake. Det de kinger die ut thoes spreake, ut neet doa aafliere. Mer dur is mier en iere get nuddig. In de veurige periode heed mien collega Mariska Werrij al aandacht gevraagd um auch bij consulatiebureaus t belang van dien moodertaal onger de aandacht te bringe. We zeen de doelgroep “jonge oajers” onvoldoende truuk in dit veurstil. Wat kin GS doa nag aan doen? En wie goan we dur vur zorge det we de lierkrachte en medewerkers van opvang en sjoele neet nag mier belaste. Wie geit ut college uberhaupt um mit ut vermindere van regeldruk in relatie tut dit veurstil? Gear uch reactie doaop.

Wat betreft t deil 3 vinge we ut super det in dit veurstil dur veur gekoze wurd um ut eine te doen en ut angere neet te loate. Mer loate we os dur van bewust zien det de status un middel is en gin doel op zich. Wea dinke wel det dit un hiel effectief middel kin zien um os taal leavend te hoije. En as ich os taal zek, dan bedoel ich os versjillende dialecte. Ich merk det dur mei misverstank en gedeuns ontsteit doordet we over *de*

Limburgse taal spreake, dus auch det gear in de campagne mitnimme. Al os dialecte zien eave belangriek. Wie zuut GS dit? En wie wied zien de meugelikhede um straks de tekst in ut Vinnels of in ut Mestreechs te vertale. Zoedes se unne moelejan, neet mit kusmoele geis verwarre. Of des se neet op t gouvernement mos zien as se heij in Mestreech commissies doon.

Mer wat we auch in Friesland zoge is det we eavel wel de kerk in ut midde motte loate. Ut is hiel good det we flink investere in ut leavend hoije van os taal... mer dur zien wel grenze. Daarom vur os nou ginne blanco cheque vur strak mer vol aan ne bak um te kieke of deil 3 auch financieel redelijk oet te veure zal zien.

Want ondanks ut geld en energie dea dur ingestoke wurd, hubbe we nag steeds mier Limburgers die Limburgs spreake als Frieze Fries, auch relatief. Doa mot un reje vur zien. Wea verwachte det os volkscultuur, ozze muziek, ozze vasteloavend doa wel us unne bepalende factor in kin zien. En as det zoe is dan motte we auch good kieke noa de inzit en de verdeiling van de middele. Van de sjroam. Daarom det wea pleite vur ongerzeuk specifiek op det gebied zoedet os beleid effectief geit zien.

Kin de gedeputeerde det toezegge

Mesjien wel ut belangriekste det we in Friesland zage waar de krach van same. Bleij det we vandaag auch de verordening aanpasse zoedet os Staote kommitee van start kin goan. Same is auch en veural same mit uch. Daarom dank aan de inspreakers, aan de veule steun betuginge die we kregen, aan Ron, aan Lotte, aan de minse achter LEI, aan de minse van ut Hoes en t Limburgs Museum en aan idderein dea ut Limburgs un werm hert toedreugt. Veural erkentelijkheid aan degene die al zoeveul joare mit os dialecte daadwerkelijk bezig zien in gedichte, beuk, muziek of anders. In t biezonger de raad vur ut Limburgs, die steeds hebbe volgehoije. Hiel veul succes vur de actiecommissie "Same vur t Limburgs" en we hope op un hiele goije samenwerking mit ut werkveld. Mer veural vanaaf dees plek danke aan de veurige generaties, aan os oaijers die os plat lierde kalle, die ut os mit de paplepel ingegeave hubbe.